

## SARS e matsholong a fapaneng a ho setjha le ho hapa thepa makaleng a fapaneng

**Tshwane, 7 Mmesa 2022** - Ditshebeletso tsa Lekgetho tsa Afrika Borwa (SARS) ka Karolo ya Lekgetho la Dihlopha le Karolo ya Bonokwane ba Bolaodi ba Meedi, di entse matsholo a phenyo le kgapo hodima ditheo tsa lekala la dibanka, la kwae le disakarete, tahi, kgauta le di-indasteri tsa diaparo mane KwaZulu-Natal, Kapa Bophirima le Gauteng.

Mapatlalo a ileng a lekolwa le ho phenywa a akaretsa matlo a balefalekgetho ba itseng le basebetsi ba indasteri ya kgauta le ya dibanka. Matsholo ana a amana le diphuputso tse batsi mmoho le dioditi tse mabapi le phallo e seng molaong ya ditjhelete mmoho le kgwebisano e seng molaong ka kgauta, tahi, diaparo, disakarete le dihlahiswa tsa kwae.

Sepheo sa ho kena dipakeng hona ho metjha e mmedi: wa pele, ke ho thusa SARS ka metjha ya yona ya nnetefatso bakeng sa boikobelo le ho hlwaya lesedi le ka tshehetsang dioditi tse jwalo. Wa bobedi, SARS e ka tshehetsa bopaki boo e seng e na le bona bakeng sa tse mabapi le diketsahalo tsa bonokwane.

Ho kena dipakeng hona ho entswe ka mora hore ho ehlwe diposo tse ka bang teng ditsebahatsong tsa bolaodi ba meedi le ho dikgutliso tsa lekgetho tse amanang le ditheo tse jwalo mmoho le diteitemente tsa banka tse neng di sa tshepahale.

Ho se seng sa ditheo tse hlwailweng, SARS e fumane taelo ya ho phenya le ho hapa mapatlaleng a Bullion Star (Pty) Ltd ka Mantaha wa la 28 Tlhakubele 2021 mane Lekgotleng le Phahameng la North Gauteng. Bullion Star ke setheo sa tlhwekiso ya kgauta mme e na le mapatlalo a ho fetola dimenerale ho ba dihlahiswa tsa boleng bo hodimo, tse ka rekiswang mona lapeng kapa tsa romelwa ka ntle ho naha. Bullion Star ke moremeladithoto ka ntle ho naha ya ngodisitsweng.

Ho fapana le dikgutliso tsa pejana tse nyehetsweng ke Bullion Star ho SARS, dikgutliso tsa VAT tse nyehetsweng ka 2022/02 di bontshitse tseko ya pusetso ya tjhelete e kana ka R13.9 million. Pele ho mafelo a Pherekong 2022, Bullion Star e ne e sa romelle dithoto dife kapa dife ka ntle ho naha, empa ka Hlakola 2022, Bullion Star e rometse ka ntle kgauta e sa phethelwang e fetang R126 million.

Ho kgeloha hona ho bakile hore Bullion Star e kgethelwe hore ho oditwe merero ya lekgetho mme lengolo la ho phenya le ile la ntshuwa hore ho tle ho fumanwe lesedi le mabapi le dithoto tse na tse rekisitsweng le tse rometsweng ka ntle ho naha ke Bullion Star.

Lengolo lena le ntsheditse mapatlelo a mararo. Le ha ho le jwalo, Bullion Star e ile ya hanela SARS ho kena mapatlelong a dikgwebo tsa yona le ho fihlella dipalangwang tse mapatlelong a yona. Kgatiso ya video ya tshireletso e bontshitse ka moo dithoto di neng di tloswa mapatlelong a kgwebo le ho kenngwa ka hara dipalangwang tse mapatlelong a yona, pele SARS e dumellwa ho kena sebakeng seo. Ka lebaka la hore dithoto tsena e ka ba tsa bohlokwa diphuputso tsa SARS, le ka thuso ya Ditshebeletso tsa Sepolesa sa Afrika Borwa le Bolaodi ba Diphuputso tsa Bonokwane ba Mantlha (Hawks), SARS e hapile bopaki bo amehang ho tswa dipalangwang tseo.

Ka mokgwa o tshwanang, ba dulang ntlong ya bodulo ya molaodi wa Bullion Star le bona ba ile ba hanela SARS ho kena ka bodulong bona le ho hana ho neha SARS disebediswa tsa elektronike. Mapatlelo ana mmoho le mehala ho ne ho kgolwa hore a na le lesedi la bohlokwa le mabapi le diphuputso tsena. SARS e ile ya kopa thuso ya SAPS ho kgona ho kena mapatlelong ana le ho hapa dithoto tse neng di le mapatlelong ana.

SARS e kgothaletsa balefalekgetho le bahwebi bohle ho netefatsa hore boitlamo ba bona ba lekgetho le ba bolaodi ba meedi bo dula bo le dinakong le ho bapa le melao ya lekgetho le ya bolaodi ba meedi. Ho feta moo, SARS e lakatsa ho leboha SAPS le DPCI ka ho sebetisa ho bapa le katamelo yohle ya mmuso ya ho etsa bonnete ba hore ho kena dipakeng hona ho etsahala ka katleho.

Khomishenara ya SARS, Mong. Edward Kieswetter, o tobokeditse boitlamo ba mokgatlo le bo batsi ba mmuso ba ho lwantshana le kgwebisano e seng molaong le diketsahalo tsa ikonomi tse seng molaong. O itse, "Batho bao ba ikemiseditseng le ba etsang ka boomo ho utswa se lokelang ho kena mokotleng wa naha ka diketso tse sa ikobeleng tefo ya lekgetho, ba tla kopana le pela di falla ho ya ka molao. Re tla etsa hore boitshwaro bo tjena bo be thata le ho ba theko e hodimo."

Ho fumana lesedi le fetang lena, ka kopo ikopanye le [SARSMedia@sars.gov.za](mailto:SARSMedia@sars.gov.za)